

唐李長吉詩集四卷

唐隴西李賀長吉父著

瑤華樂

穆天子走龍媒八轡冬瓏逐天迴五精掃地
凝雲開高門左右日月環四方錯鏤稜層殷
舞霞垂尾長盤珊江澄海淨神母顏施紅點
翠照虞泉曳雲拖玉下崑山列旆如松張蓋
如輪金風殿秋清明發春八轡十乘轟如雲

屯瓊鍾瑤席甘露文玄霜降雪何足云薰梅
染柳將贈君鉛華之水洗君骨與君相對作
真質

北中寒

一方黑照三方紫黃河水合魚龍死三尺木
皮斷文理百石強車上河水霜花草上大如
錢揮刀不入迷濛天爭滄海水飛凌喧山瀑
無聲玉虹懸

梁臺古愁

梁王臺沼空中立天河之水夜飛入臺前闔
玉作蛟龍綠粉掃天愁露濕撞鍾飲酒行射
天金虎威裘噴血班朝朝暮暮愁海翻長繩
繫日樂當年芙蓉凝紅得秋色蘭臉別春啼
脉脉蘆洲客鴈報春來寒落野湟秋漫白

公無出門

天迷迷地密密熊虺食人竟雪霜斷人骨嗾

犬唁唁相索索舐掌偏宜佩蘭客帝遣乘軒
灾自滅玉星點劍黃金輓我雖跨馬不得還
歷陽湖波大如山毒虬相視振金環後猊猊
偷吐嚙涎鮑焦一世披草眠顏回廿九鬢毛
班顏回非血衰鮑焦不違天天畏遭啣齧所
以致之然分明猶懼公不信公看呵壁書問
天

神絃曲

西山日沒東山昏旋風吹馬馬踏雲畫絃素
管聲淺繁花裙綵繚步秋塵桂葉刷風桂墜
子青狸哭血寒狐死古壁彩虬金帖尾雨工
騎入秋潭水百年老鴉成木魅笑聲碧火巢
中起

神絃

女巫澆酒雲滿空玉爐炭火香爨爨海神山
鬼來座中紙錢窸窣鳴颼風相思木帖金舞

鸞攢蛾一嚏重一彈呼星召鬼歆杯盤山魅
食時人森寒終南日色低平灣神兮長在有
無間神嗔神喜師更顏送神萬騎還青山

神絃別曲

巫山小女隔雲別春風松花山上發綠蓋獨
穿香逕歸白馬花竿前子子蜀江風澹水如
羅墮蘭誰泛相經過南山桂樹為君死雲衫
淺污紅脂花

綠水詞

今宵好風月阿侯在何處為有傾人色翻成
足愁苦東湖採蓮葉南湖拔蒲根未持寄小
姑且持感秋魂

沙路曲

柳臉半眠丞相樹珮馬釘鈴踏沙路斷燼遺
香裊翠煙燭騎啼鳴上天去帝家玉龍開九
關帝前動笏稱南山獨垂重印押千官金窠

篆字紅屈盤沙路歸來聞好語旱火不光天

下雨

上之回

上之回大旗喜懸紅雲捷鳳尾劔匣破舞蛟
龍蚩尤死鼓逢逢天齊慶雷齊墜地地無驚
煙海千里

高軒過

韓員外愈皇甫侍御湜見過因而命作

華裾織翠青如葱金環壓轡搖玲瓏馬蹄隱
耳聲隆隆入門下馬氣如虹云是東京才子
文章鉅公二十八宿羅心育元精耿耿貫當
中殿前作賦聲摩空筆補造化天無功龐眉
書客感秋蓬誰知死草生華風我今垂翅附
冥鴻他日不羞蛇作龍

具宮夫人

丁丁海女弄金環雀釵翹揭雙翅關六宮不

李詩八四卷
五
語一生閑高懸銀榜照青山長眉凝綠幾千
年清涼堪老鏡中鸞秋肌稍覺玉衣寒空光
帖妥水如天

蘭香神女廟 三月中作

古春年年在閑綠搖暖雲松香飛晚華柳渚
含日昏沙砲落紅滿石泉生水芹幽篁畫新
粉蛾綠橫曉門弱蕙不勝露山秀愁空春舞
珮剪鸞翼帳帶塗輕銀蘭桂吹濃香菱藕長

莘莘看雨逢瑤姬乘舸值江君吹簫飲酒醉
結綬金絲裙走天呵白鹿遊水鞭錦鱗密髮
虛鬟飛膩頰凝花勻團鬢分珠窠穠眉籠小
脣弄蝶和輕妍風光怯腰身深闌金鴨冷奩
鏡幽鳳塵踏霧乘風歸撼玉山上門

送常仁實兄弟入關

送客飲別酒千觴無赭顏何物最傷心馬首
鳴金鑲野色浩無主秋明空曠間坐來壯膽

破斷目不能看行槐引西道青梢長攢攢帚
郎好兄弟疊玉生文翰我在山上舍一畝蒿
磽田夜雨叫租吏春聲暗交關誰解念勞勞
蒼突唯南山

洛陽城外別皇甫湜

洛陽吹別風龍門起斷烟冬樹束生澁晚紫
凝華天單身野霜上疲馬飛蓬間凭軒一雙
淚奉墜綠衣前

溪晚涼

白狐尚月號山風秋寒掃雲留碧空玉煙青
濕白如幢銀灣曉轉流天東溪汀眠鷺夢征
鴻輕連不語細游溶層岫迴岑複疊龍苦篁
對客吟歌筒

官不來題皇甫湜先輩廳

官不來官庭秋老桐錯幹青龍愁書司曹佐
走如牛疊聲問佐官來否官不來門幽幽

長平箭頭歌

漆灰骨未丹水沙淒淒古血生銅花白翎金
簞雨中盡直餘三脊殘狼牙我尋平原乘兩
馬驛東石田蒿塢下風長日短星蕭蕭黑旗
雲濕懸空夜左冤右魄啼肌瘦酪瓶倒盡將
羊炙蟲棲鴈病蘆筍紅迴風送客吹陰火訪
古洿瀾收斷鏃折鋒赤壘曾封肉南陌東城
馬上兒勸我將金換箬竹

江樓曲

樓前流水江陵道鯉魚風起芙蓉老曉釵催
鬢語南風抽帆歸來一日功鼉吟浦口飛梅
雨竿頭酒旗換青苧蕭騷浪白雲差池黃粉
油衫寄郎主新槽酒聲苦無力南湖一傾菱
花白眼前便有千里愁小玉開屏見山色

塞下曲

胡角引北風薊門白於水天含青海道城頭

李詩不四卷
月千里露下旗濛濛寒金鳴夜刻蕃甲鏤蛇
麟馬嘶青塚白秋靜見旄頭沙遠席羈愁帳
北天應盡河聲出塞流

染絲上春機

玉鬕汲水桐花井絲蒨沉水如雲影美人懶
態燕脂愁春梭拋擲鳴高樓綵線結茸背複
疊白袷玉郎寄桃葉為君挑鵲作腰綬願君
處處宜春雪

五粒小松歌

前謝秀才杜雲卿命予作五粒小松歌予
以選書多事不治曲辭經十日聊道八句
以當命意

蛇子蛇孫鱗蜿蜿新香幾粒洪崖飯綠波浸
葉滿濃光細束龍髯鉸刀剪主人壁上鋪州
圖主人堂前多俗儒月明白露秋淚滴石筍
溪雲肯寄書

塘上行

藕花涼露濕花缺藕根澁飛下雌鴛鴦塘水
聲澹澹

呂將軍歌

呂將軍騎赤兔獨攜大膽出秦門金粟堆邊
哭陵樹北方逆氣汗青天劍龍夜叫將軍閑
將軍振袖揮劍鏢玉闕朱城有門閣燼燼銀
龜搖白馬傳粉女郎火旗下恒山鐵騎請金

搶遙聞箴中花箭香西郊寒蓬葉如刺皇天
親栽養神驥廐中高桁排蹇蹄飽食青藜飲
白水圓蒼低迷蓋張地九州人事皆如此赤
山秀鋌禦時英綠眼將軍會天意

休洗紅

休洗紅洗多紅色淺卿卿騁少年昨日殷橋
見封侯早歸來莫作弦上箭

野歌

鷗翎羽箭山桑弓仰天射落銜蘆鴻麻衣黑
肥衝北風帶酒日晚歌田中男兒屈窮心不
窮枯榮不等嗔天公寒風又變為春柳條條
看即烟濛濛

將進酒

琉璃鍾琥珀濃小槽酒滴真珠紅烹龍炮鳳
玉脂泣羅屏繡幕圍香風吹龍笛擊鼉鼓皓
齒歌細腰舞况是青春日將暮桃花亂落如

紅雨勸君終日酩酊醉酒不到劉伶墳上土
美人梳頭歌

西施曉夢綃帳寒香鬟墮髻半沉檀輓轡
啞轉鳴玉驚起芙蓉睡新足雙鵞開鏡秋水
光解鬟臨鏡立象牀一編香絲雲撒地玉釵
落處無聲膩纖手却盤老鴉色翠滑寶釵簪
不得春風爛熳惱嬌慵十八鬟多無氣力粧
成鬢鬢歎不斜雲裾數步踏鴈沙背人不語

向何處下階自折櫻桃花

月漉漉篇

月漉漉波煙玉莎青桂花繁芙蓉別江木粉
態袂羅寒鴈羽鋪煙濕誰能看石帆乘船鏡
中入秋白鮮紅死水香蓮子齊挽菱隔歌袖
綠刺冑銀泥

京城

驅馬出門意窄落長安心兩事誰向道自作

秋風吟

官街鼓

曉聲隆隆催轉日暮聲隆隆呼月出漢城黃
柳映新簾栢陵飛燕埋香骨砲發千年日長
白孝武秦王聽不得從君翠髮蘆花色獨共
南山守中國幾迴天上葬神仙漏聲相將無
斷續

許公子鄭姬歌

許史世家外親貴宮錦千端買沉醉銅駝酒
熟烘明膠古堤大柳煙中翠桂開客花名鄭
袖入洛聞香鼎門口先將芍藥獻粧臺後解
黃金大如斗莫愁簾中許合歡清絃五十為
君彈彈聲咽春弄君骨骨興牽人馬上鞍兩
馬八蹄踏蘭苑情如合竹誰能見夜光玉枕
棲鳳凰袷羅當門刺純綫長翻蜀紙卷明君
轉角含商破碧雲自從小壓果東道曲裏長

眉少見人相如墳上生秋栢三春誰是言情
客蛾鬟醉眼拜諸宗為謁皇孫請曹植

新夏歌

曉木千籠真蠟綵落蒂枯香數分在陰枝拳
牙卷縹帶長風迴氣扶葱籠野家麥畦上新
壠長畛徘徊桑柘重刺香滿地菖蒲草雨梁
燕語悲身老三月搖揚入河道天濃地濃柳
梳掃

題歸夢

長安風雨夜書客夢昌谷怡怡中堂笑小弟
栽澗菘家門厚重意望我飽飢腹勞勞一寸
心燈花照魚目

經沙苑

野水泛長瀾宮牙開小菑無人柳自春草渚
鴛鴦暖晴嘶臥沙馬老去悲啼展今春還不
歸塞嚶折翅鴈

出城別張又新酌李漢

李子別上國南山崆峒春不聞今夕鼓差慰
煎情人趙一賦命薄馬卿家業貧鄉書何所
報紫蕨生石雲長安玉桂國戟帶披侯門慘
陰地自光寶馬踏曉昏臘春戲草苑玉輓鳴
轆轤綠網緹金鈴霞卷清地滑開貫瀉蚨母
買冰防夏蠅時宜裂大被劍客車盤茵小人
如死灰心切生秋榛皇圖跨四海百姓施長

紳光明藹不發腰龜徒斲銀吾將譟禮樂聲
調摩清新歌使十千歲帝道如飛神華實自
蒼老流來長傾盆沒沒暗齧舌涕血不敢論
今將下東道祭酒而別秦六郡無勦兒長刀
誰拭塵地理陽無正快馬逐服轅二子美年
少調道講清渾譏笑斷冬夜家庭踈蓀穿曙
風起四方秋月當東懸賦詩面投擲悲哉不
遇人此別定霑臆越布先裁巾

南園

方領蕙帶折角巾杜若已老蘭苕春南山削
秀監玉合小雨歸去飛涼雲熟杏暖香梨葉
老草稍竹柵鎖池痕鄭公鄉老開酒尊坐泛
楚奏吟招魂

假龍吟歌

石乾銅杯吟詠枯瘁蒼鷹擺血白鳳下肺桂
子自落雲弄車蓋木死沙崩惡谿島阿母得

仙今不老甯中跳汰截清涎隈壩臥水埋金
瓜崖磴蒼苔吊石髮江君掩帳篋管折蓮花
去國一千年兩後聞腥猶帶鐵

感調一首

人間春蕩蕩帳暖香揚揚飛光染幽紅誇嬌
來洞房舞席泥金蛇桐竹羅花牀眼逐春暝
醉粉隨淚色黃王子下馬來曲沼鳴鴛鴦馬
知腸車轉一夕巡九方

其二

苦風吹朔寒沙驚秦木折舞影逐空天畫鼓
餘清節蜀書秋信斷黑水朝波咽嬌魂從回
風死處懸鄉月

其三

雜雜胡馬塵森森邊士戟天教胡馬戰曉雲
皆血色婦人攜漢卒箭箠囊巾幘不慙金印
重踉蹌腰鞬力恂恂鄉門老昨夜試鋒鏑走

馬遣書勳誰能分粉墨

其四

青門放彈去馬色連空郊何年帝家物玉裝
鞍上搖去去走犬歸來來坐烹羔千金不了
饌格肉稱盤臊試問誰家子乃老能佩刀西
山白蓋下賢雋寒蕭蕭

其五

曉菊泣寒露似悲團扇風秋涼經漢殿班子

泣衰紅本無辭輦意豈見入空宮腰被珮珠
斷灰蝶生陰松

其六

蝶飛紅粉臺柳掃吹笙道十日懸戶庭九秋
無衰草調歌送風轉杯池白魚小水宴截香
腴菱科映青罩羊蒙梨花滿春昏弄長笑唯
愁苦花落不悞世哀到撫舊唯銷魂南山坐
悲嘯

愁曲

草生龍坡下鴉噪城堞頭何人此城裏城角
栽石榴青絲繫五馬黃金絡雙牛白魚駕蓮
船夜作十里游歸來無人識暗上沉香樓羅
牀倚瑤瑟殘月傾簾鈎今日槿花落明朝桐
樹秋莫負平生意何名何莫愁

夜來樂

紅羅複帳金流蘇華燈九枝懸鯉魚麗人映

月開銅鋪春水滴酒猩猩沽價重一篋香十
株赤金瓜子兼雜麩五色絲封青玉鳧阿侯
此笑千。萬餘南軒漢轉簾影踈桐林啞啞
挾子烏劍崖鞭節青石珠白駒吹湍凝霜鬚
漏長送珮承明廬倡樓嵯峨明月孤續客下
馬故客去綠蟬秀黛重拂梳

朝雪

昨日發葱嶺今朝下蘭渚喜從千里來亂笑

含春語龍沙濕漢旗鳳翅。○迎秦素久別遼
城鶴毛衣已應故

春懷引

芳溪密影成花洞柳結濃煙花帶重蟾蜍碾
玉挂明弓捍撥裝金打仙鳳寶枕垂雲選春
夢鈿合碧寒龍腦凍阿侯繫錦覓周郎憑仗
東風好相送

白虎行

火烏日暗崩騰雲秦皇虎視蒼生群燒書滅
國無暇日鑄劍佩玦呼將軍玉壇設醮思冲
天一世二世當萬年燒丹求得不死藥拏舟
海上尋神仙鯨魚張鬣海波沸耕人半作征
人鬼雄豪猛焰烈燒空無人為决天河水誰
最苦兮誰最苦報人義士深相許漸離擊筑
荆卿歌荆卿把酒燕丹語劍如霜兮膽如鐵
出燕城兮望秦月天授秦封祚未終衮龍衣

李長吉詩八四卷
點荆卿血朱旗卓地白虎死漢皇知是真天子

有所思

去年陌上歌離曲今日君書遠遊蜀簾外花
開二月風臺前淚滴千行竹琴心與妾腸此
夜斷還續想君白馬懸雕弓世間何處無春
風君心未肯鎮如石妾顏不久如花紅夜殘
高碧橫長河河上無梁空白波西風未起悲

龍梭年年織素攢雙蛾江山迢遞無休絕淚
眼看燈乍明滅自從孤館深鎖窻桂花幾度
圓還缺鴉鴉向曉鳴森木風過池塘響叢玉
白日蕭條夢不成橋南更問仙人卜

嘲少年

青驄馬肥金鞍光龍腦入縷羅衫香美人挾
坐飛瓊觴貧人喚云天上郎別起高樓臨碧
篠絲曳紅鱗出深沼有時半醉百花前背把

金丸落飛鳥自說生來未為客一身美妾過
三百豈知斲地種田家官稅頻催沒人織長
金積玉誇豪毅每揖閑人多意氣生來不讀
半行書只把黃金買身貴少年安得長少年
海波尚變為桑田榮枯遞傳急如箭天公豈
肯於公偏莫道韶華鎮長在髮白面皺轉相
待

高平縣東私路

侵侵榭葉香木花滯寒雨今夕山上秋永謝
無人處石磨遠荒澁棠實懸辛苦古者定幽
尋呼君作私路

神仙曲

碧峯海面藏靈書上帝揀作仙人居清明笑
語聞空虛鬪乘巨浪騎鯨魚春羅書字邀王
母共宴紅樓最深處鶴羽衝風過海遲不如
却使青龍去猶疑王母不相許垂霧娃鬟更

轉語

龍夜吟

鬢髮胡兒眼睛綠高樓夜靜吹橫竹一聲似
向天上來月下美人望鄉哭直排七點星藏
指暗合清風調宮徵蜀道秋深雲滿林湘江
半夜龍驚起玉堂美人邊塞情碧窓皓月愁
中聽寒砧能擣百尺練粉泪凝珠滴紅線胡
兒莫作隴頭吟隔窓暗結愁人心

崑崙使者

崑崙使者無消息茂陵烟樹生愁色金盤玉
露自淋漓元氣茫茫收不得麒麟背上石文
裂虬龍鱗下紅肢折何處偏傷萬國心中天
夜久高明月

嘆唐姬飲酒歌

御服沾霜露天衢長藜棘金隱秋塵婆無人
為帶飾玉堂歌聲寢芳林烟樹隔雲陽臺上

歌鬼哭復何益伏劔明秋水兇威屢脇逼疆
梟噬母心犇厲索人魄相看兩相泣泪下如
波激寧用清酒為歆作黃泉客不說玉山頽
且無飲中色勉從天帝訴天上寡沈厄無處
張繡帷如何望松栢妾身晝團團君魂夜寂
寂蛾眉自覺長頸粉誰憐白矜持昭陽意不
肯卽南陌

聽穎師琴歌

別浦雲歸桂花渚蜀國絃中震鳳語芙蓉華
落秋鷺離越王夜起遊天姥暗佩清臣敲水
玉渡海蛾眉牽白鹿誰看挾劔赴長橋誰看
浸髮題春竹竺僧前立當吾門梵宮真相眉
稜尊古琴大軫長八尺嶧陽老樹非桐孫涼
館聞絃驚病客藥囊暫別龍鬚席請歌直請
鄉相歌奉禮官卑復何益

謠俗

李長吉詩集四卷
上林胡蝶小試伴漢家君飛向南城去誤落
石榴裙脉脉花滿樹翩翩燕遶雲出門不識
路羞問陌頭人

李長吉詩集四卷終

當召長吉長吉不能讀歛下榻叩頭
言阿彌老且病賀不願往緋衣人笑
曰帝成白玉樓召君為記天上差樂
不苦也旁人見之少頃氣絕詳觀此
語甚不經無亦病亂譫語耳夫天一
氣物何以玉樓為必若召為記當時

先韓吏部矣萬萬無此理蓋如鬼才
等語大率好事者為之重以見賀才
絕出云安慶有是集字刻率易宗敬
守寧政暇味是詩而知所向往者甚
以字本不愜觀閱翻刻于謝朓樓屬
予題其後因疑賀事遂妄為之辯

弘治壬戌仲秋汝寧石門居士劉淮

李長吉詩集後序

畢

